

Uunga siunnersuut: Kalaallit Nunaata Aatsitassarsiornermik Aningaasaateqarfia pillugu Inatsisartut inatsisaata allanngortinneqarnera pillugu Inatsisartut inatsisaat nr. xx, xx. xxx 2017-imeersoq

(Aningaasaqarnermut Akileraartarnermullu Naalakkersuisoq)

Saqqummiussissut

(Aningaasaqarnermut Akileraartarnermullu Naalakkersuisoq)

Siullermeerneqarnera

Matumuuna Naalakkersuisut sinnerlugit Kalaallit Nunaata Aatsitassarsiornermik Aningaasaateqarfia pillugu Inatsisartut inatsisaata allanngortinneqarnera pillugu Inatsisartut inatsisissaattut siunnersuut saqqummiutissavara.

Inatsisartut 2015-imi ukiakkut ataatsimiinnermi UKA2015/120-tut Inatsisartut aalajangiiffigisassaattut siunnersuutip akuerineqartup kingunerisaanik siunnersuut suliarineqarpoq.

Inatsisartut aalajangiiffigisaanni erserpoq, aningaasaateqarfimmi aningaasaatinit katersanit pissarsianik taamaallaat atuisoqarsinnaanissaanut periarfissiinissaq siunertaralugu aatsitassarsiornermik aningaasaateqarfik pillugu inatsimmut allannguutissatut siunnersuummik Naalakkersuisut saqqummiussissasut.

Siunnersuut naapertorlugu aningaasaateqarfimmi aningaasanik katersanik pissarsiat ilaannai nunatta karsianut tunniussinnaavai. Siunnersuummik tunngavissinneqassaaq, siunissami kinguaariit eqqarsaatigalugit aatsitassarsiornermik aningaasaateqarfiup aningaasaataasa nalingisa annikillisannginnissaat. Taamaattorli ataatsimoortumik tapiissutit annikillineqarnerini naligiissariniarluni aningaasaateqarfimmit nunatta karsianut aningaasanik nuussisoqarsinnaassaaq.

Inatsimmi atuuttumi aningaasaateqarfiup aqunneqarnera, ingerlanneqarnera allaffissorneralu pillugit malittarisassanik arlalinnik peqarpoq. Malittarisassat taakku aningaasaateqarfiup aallartisarnerani aningaasaataasa amerlassusaanut naleqqiullugu aningaasartuutininik arlalinnik tutsitsissapput. Taamaattumik siunnersuutigineqarpoq, ikaarsaariarnissamik aaqqiissummik eqqussisoqassasoq, tassani aningaasaateqarfimmi aningaasaatit, taakkuninngalu pissarsiat aningaasaateqarfiup aningaasartuutaanik akilersinnaalernissaata tungaanut allaffissorneq il.il. Naalakkersuisunit ingerlanneqassasoq.

Aningaasaateqarfiup aningaasaliissutaanik annertunerusumik pissarsiaqarnissamut ilimanaatit pitsanngorsarniarlugit, siunnersuutigineqarpoq aningaasaliinissamut malittarisassat atuuttut sukaterneqassasut, taamaasilluni aningaasaleeriaaseq Aatsitassarsiornermik Aningaasaateqarfimmik ungasissoq eqqarsaatigalugu siunertarisamut tulluarsarniarlugu.

Matuma saniatigut inatsisiliornikkut arlalinnik aaqqiisoqarpoq.

Taama oqaaseqarlunga Naalakkersuisut sinnerlugit siunnersuut Inatsisartuni suliarineqarnissaanut tunniuppara.